

戴寶冠而在風輪，卽法華經諸有所作，皆爲佛知見意也。守護章云：真觀以後，日照實又難陀流志金剛智善無畏不空般若等三藏所傳，一乘正義皆符天台義門。已上諸文，並略抄。

二者二經同名秘密藏，故法華云：當知是妙法諸佛之秘要。又云：一切如來秘要之藏。又云：如來秘密神通之力。法華論列十七名，第八名一切諸佛秘密處。天台法華玄云：秘密奧藏爲妙，蘇悉地疏云：教有二種，一顯示教謂阿含深密等諸三乘教也，二秘密教謂華嚴維摩般若法華涅槃等也。秘密教亦有二，一唯理秘密教謂華嚴等，唯說圓融不說三密行，故二事理俱密教，謂大日金剛頂等說圓融不二，亦說三密行。故云云。私云：若天台判教有二，一者四教相望，三教爲麤，圓教爲妙，故諸大乘有妙有麤，二者五味相望，四味爲麤，雖有圓妙，以兼權教，故總爲麤，唯以法華純圓爲妙，準例應云：四教相望，故諸大乘亦名秘密圓是密，故若約五味，唯以法華爲秘密耳。高麗覺苑師大日經疏演密抄云：顯者五性三乘是也，密者摠持秘藏是也。云云。此師面受善無畏三藏演秘密宗，彼亦於顯教不取一乘也。三者二經同是圓教義，故演密抄云：今神變經與此大同圓教所攝，又云：問華嚴般若劣於如來秘藏耶？答：此乃宗果是同，但顯秘爲異，前約教相圖極攝諸了義，後約威靈光驗屬以秘宗，復何疑哉？云云。他家以圓教佛果爲秘密，因分卽違此文。菩提心義云：法華與真言同，是超八圓教云云。四者二經同是醍醐味，故六波羅密經以三藏及般若爲前四味，以陀羅尼秘藏爲醍醐味，涅槃經中以諸經爲前四味，以法華涅槃爲醍醐味，德圓和尚遣唐疑問云：大日經五時中何時攝四教？中何教攝耶？爲是法華前後說耶？宗穎決云：義推可屬第五時攝，純談圓教無兼等，故四教中是圓教，彼經云：舉足下足皆是印契，一切語言無非真言，又云：從佛至于蝸蟲等，無非毘盧遮那法界身等，便同圓門一色一香無非中道，所以一行禪師全用圓義釋經文也。略抄五者二宗同依智論等，故大日經疏釋彼宗義，但依龍樹智論釋義，亦以中論中道爲本義。釋云：龍樹阿闍梨中道正觀，無生義成云云。天台亦爾，豈可不同耶？六者二宗同明界外義，故菩提心論云：若定性者，難可發生，要待劫限等滿，方乃發生云云。此明定性二乘界外回心，不同唯識入寂定。